

**J b**  
3519 f



00  
Rom



0



**Auflegung der tröst**

**lichen wort Christi. Matthei. xi. Ich  
preyß dich vatter. Bis ans endt.**

**Des Capitel. Durch Mart.**

**Luth. zu Wittenberg**

**im jar. M. D.**

**vnd. xxvij.**

**H  
i R**



L 2, 3392.

## Euangelion Matthei. xj.

**I**hesus sprach. Ich preys dich vatter vnd heri des hymels vñ der erden/das du solchs den weysen vñ verstebigen verporge hast vnd hast es den vnmündigen offenbart. Ja vatter/den es ist also wolgefellig gewesen für dir. Alle ding sind mir vbergeben von meynem vatter/vñ d niemand kennet den son/den nur der vatter/vnd niemand kennet den vatter/den nur der son/vnd wem es der son will offenbaren.

Kumpt her zu mir/alle die jr mühselig vñ beladen seyt/ich will euch erquicken. Nempt auff euch mein joch/vñ lernet von mir/den ich bin senffmütig vnd vñ hertzen demütig so werdet jr rühe findē für ewre selē/den mein joch ist senfft/vnd meyn last ist leicht.

**D**is ist eyn tröstlichs Euangelion/inn welchem si ch der heri selbs erstlich tröstet/vnd darnach vns in jm tröstet/welcher trost vns hoch vñ nöten ist/die wir nach sind vñ der des Teuffels reich. Lucas sagt/wie si ch der heri erfrewet hab im geyst/vnd für freuden auffgespuungen. Vrsach aber dyses Euangelij ist die / das der heri schier drey jar in Galilea vñbher gepredigt hatte/vnd seine predige mit wunderzaychen bestettigt/vnd doch nichts außgerichtet/ja die weysen hieltens für eyn narheyt vñ spot / wie es demnach hertigs tags geet/vñ soll also geen/das die klügsten dyser welt/sollen die predigen des Euangelions verachten/verspotten vnd verdammen. Darumb schreybet Mattheus allhie zuuor/wie der heri die stet gestrafft vñ gescholten hatt/dar in er gepredigt/vnd wunder gethan hatt/vñ doch nichts bey jnen außgericht/vnd hatt also gesagt.

**Wehe dir Corazin. wehe dir Bethsaida/weren solliche thaten zu Tyro vnd Sydon geschehen/als bey euch geschehen sind/sie hetten vor zeytten im sack vnd in der aschen büß gethan/doch ich sag euch / es wirt Tyro vnd**

Sidon treglicher ergen am jüngsten gericht/den euch. Vñ  
du Capernaum/die du bist erhabē bis an den hymel/du wirst  
bis in die hell hynunder gestossen werden. Den so zu Sodo-  
ma die thaten geschē weren/die bey dir geschehen sind/sie  
stünd noch herwigs tags. Doch ich sag euch/es wirt der So-  
domiter land erreglicher geen am jüngsten gericht den dir.

Auff dyse wort volget nun das herwig Euangelion/in wel-  
chem Christus erstlich also zu got seinē hymlichē vatter sagt  
**Ich preys dich vatter vñ Herz hymels**  
vnd der erden/das du solchs den weysen vñ verstendigen ver-  
porgen hast/vnd hast es den vnmündigen offenbart.

Sehet ob wir nit auch also müssen thun/wie hie Christus  
thut/vñ jm gleich die wort auß dem mund nemen/Gott lobē  
vñ preysen/das er yetzund auch sein wort den klügen vñ wey-  
sen/den fromen vñ heyligen in dyser welt enzeucht/vñ offen-  
baret den vnmündigen vñ den sündern. Wir predigen vnd  
sehreyen/das Christus alleyn vnser selickayt/erlösung/vnd ge-  
nügthung sey/vnd der glaub mach alleyn selig./das wider-  
fechten die weisen vnd heyligen lewt/vnd ye mer wir solcher  
vnser predig vrsach geben/vnd die warheyt an tag pringen/  
ye zorniger sie werden. Diewet man in mit dem gericht gotes  
so verachten sie es/ir hertz ist herter den eyn ampos/der fragt  
nach keynē schlag/man schlag in so seer man wöll. Also thun  
die klügsten hochgelertsten vñ heyligsten in der welt auch.  
Des gleychen die sch wörmer/wen eyner eyn dunckel hatt für  
sich im herten gefasset/so lest er sich darvon nit triben/man  
gee mit inen vmb wie man wöll/so pleyben sie auff jrē kopff.

Wie thut jm aber Christus hie. Er lest sie faren/vñ wendet  
sich von dem verstockten zu Got seynem hymlichen vatter/  
lobet vnd preysset in/vnd hatt dennoch freude gnüg/das er  
es den kleynen offenbaret. Er will schlechts nit/das wir vns  
sollen vlassen auff die menschen/auch auff vns selbs nit paw-  
en/sonder alleyn auff Got sollen wir steen/vnd auff in alleyn  
trawen. Wenn vnser Got lachet/was fürchten wir die men-  
schen? Was fragen wir darnach/das die lewt zornen? Thū

was hie Christus thut/lobe den vatter vnd predig ymmer dar  
fort/wer es neme/der neme es. Es ist Gottes werck/went  
ers gibt/der darff mit im nit darüber rechte/den er ist niemad  
ychts pflichtig oder schuldig. Got will kurzumb sein weise  
nicht lassen vmb der Klügen willen. So ist sein art auß nicht  
ettwas zümachen/auß Todt leben/auß sünd gerechtigkeit/  
auß schmach eer/auß armüt reychthumb. Vnd summa summarū  
Was da gering ist/damit will er züschaffen haben. Lyn sol  
chen Gott haben wir/der Teuffel aber thut das widerspill/  
macht auß leben todt/auß gerechtigkeit sünd/auß eer schm  
ach/vnd summa summarū/was da groß ist für Got/das will  
er kleyn machen.

Dieweil wir nun wissen/das vnser got will denen helffen  
die hülffbedürffen/was wollen wir vns bekümmern? War  
umb seyen wir nit getrost vñ frölich? Den so er lautter Klüge  
engel/heyligen vñd frome lewt haben wolt/wo bliben wir  
arme narren/vnd elende sündere? Denn das ist ye Gott/au ch  
nach anzaygung der Heyden/den da helffen kan in den nöten  
So nun das Gottes art ist/das er helffe/so muß folgen/das  
er helffe/dakeyn hülff ist. Das wissen die weysen vnd Klügen  
in der welt nicht.

Die Klügen aber vñ verstandigen heyst der heri hie/die fey  
ne geschickte lewt seind/die da wissen annder züregiern/gele  
vnd güt künstlich züerwerben/also das sie sich auß ire weis  
heit alleyn verlassen/wollen auch in Götlichen dingen vnd  
geystlichen sachen von irer Klügheynt nicht vmb eyn har breyt  
weychen/wollen jr ding schlechts vnuerdampft haben/vnd  
gar nichts vnweyß für Got gehalten sein. Denn die selbigen  
lassen sich dunckē/es geradt men alleyn wol nach irer weis  
heit/vnd wollen Summa summarū nicht narren sein/sonder  
klüg. So will Got alleyn meyster sein/vñ gerecht bleybē. Sa  
hebt sichs den/vnd lauffen also auffeynder/sie wollen sich  
nit züschandē lassen machē/darüb komen sie nit zum herren.



So spricht nun Christus also. Ach vatter ich preyse vn lob  
dich/du pist yhe ein feyner got/das du allain wilt weise sein/  
Den sol yhe eine weisheit vntergehen/so gee ire weisheit vnter.  
Es ist besser das du die armen annemest/die dich allain  
lassen weis sein/vn ledest die weisen faren. O vater/du thust  
jn gleich recht/das du jr ding nicht preyest / als sey es recht  
vnd wolgethan/du verpirgest auch billich dis gehymnus  
für irer klügheit. Das ist vns nun seer tröstlich wie gesagt/  
Denn wo wolten sonst wir narren vnd vnuerstendigen blei-  
ben. Solichs sagt auch Paulus. j. Corin. j. Die weil die welt  
durch ire weisheit got in seiner weisheit nicht erkante/ge-  
fiel es Got wol/durch törichte predigt selig zu machen/die  
so daran glauben. Seytemal die Juden zaichē fodern/vn die  
Kriechen nach weisheit fragē. Das ist jr deckel/der selbigē  
klügen vnd weisen frommen vnd heyligen leute/sie gassen hyn  
auff vnd sperren das maul vnd oren auff/wolten das Ewan-  
gelion gerne hören/wen jnen got predigte das jr ding auch  
gült vnd recht were. Wie die papisten thun/die wolten ger-  
ne ire kappen vnd blatten/Messen vnd annder gauckelwerg  
auch lassen etwas gelten. Das sind die weisen.

Widerumb aber kumpt got/vn wil allain die armen/ellen-  
den/vnmündigen/alberer vn vnuerstendigen annemen/das  
wirdt den ein eyserne mauer für jren augen/das sie solchs nit  
können verstehen. Also heten die ketzer Ariani/vnd yetz vn-  
sere Schwärmer auch/die haben jren aygen gütdunckel/das  
sie sagen. Sy solt man Christus leyß essen im prot/vnnd seyn  
blüt im weyn. Solt Christus im prot vn weyn sein. Wie rey-  
met sich das. Was ist es von nöten/vnd der gleichen spitzige/  
giffrige/hessige wort mer/faren also in jrer maynung daher/  
vnd sind nicht würdig die wort Christi zu sehen noch zu ver-  
steen. Darumb so sie verdampft werden auß verstockung jres  
gütdunckels vn halbsstarigkeyt/darumb das sie jnen nichts  
wollen sagen lassen/so sollen wir nichts anders darzu thun/  
den hie Christus thut/sollen die sach got befehlen/jn preysen/  
vn sagen. Er thut recht das er dis gehymnus offenbart hat  
den geringen/albern vnd vnmündigen/vnnd hab es vor den  
weisen vnd klügen in der welt verporgen. A. iij.

Es seind hie zwey stuck darüber sich Christus frewet. Das erste/das gott solch geheymnus vborge hatt für den weysen vnd klügen. Das ander/das ers offenbaret hatt den kleynen/albern/vnd vnmündigen. Dis macht erst eyn rechte freude/als wolt Christus sagen/wöllens die klügen vnd weysen nit/so wöllens doch die albern vnd vnmündigen. Das sind die kynder vnd vnmündigen/die da nit reden wider gottes wort die da nicht muren wider gottes willen/sonder wie ers mit in schaffet vñ macht/so gefelt es jm wol/das sind alle die/so bey sich nicht klüg noch vstendig seind/ noch misvernunfft in gottes werck vnd wort nit fallen. Sie seind nicht schwerer vñ wascher/wie der schwerer art ist/die sich selbs treyben zü predigen/on berufft vñ onerfordert/sprechen dan/der geyst treyß sie. Das ist gewis eyn zeychen/das sie der Teuffel heyst predigen. Vnd wen du der eynen findest/wilt in leren/vnd den rechten weg weysen/so thün sie das maul auff/vnd reden hundert wort/ee du eyns redest.

Aber eyn rechter prediger ist nicht also schwerzig / bricht nit herein als sey er voller kunst/stellet sich/als kñd er nichts wie er sich den auch gewislich dafür helt/als wisse vñ kñnt er am wenigsten darvon. Die heyst der herz hie vnmündig / den die selben hören vil lieber zü/vnd wolten selbs gern schüler sein/den das sie sollē den andern predigen / wöllē nicht klüg sein wie die wascher/die nur dahyn jr hertz vñ syn wendē/das sie ander lewt leren/sie aber wöllē niemandt hörē. Vnd wiewol sie sich zü weylen für den lewten gering erzaygen/so haben sie doch eyn Adamantischen kopff/vñ trozigen geyst/der da niemandt weichen will/ja kurzvmb/seine maynung die beste/des vnd keyn anders. Die aber rechtschaffen gering seind/die weichen gern/vnd lassen sich weisen in den rechten verstandt/ja/sie seind fro/vnd dancken darumb/das sie zum rechten verstandt kōmen. Also war. S. Augustin mit gewalt herfür zogen/were vil lieber vnmündig vñ eyn schüler blißē/den das er andere sole leren. Aber er müß herfür treten/vñ der gemeyn predigen/darumb ist er auch der Best Doctor gewesen zü seyner zeyt / vñnd hatt auch etwas mit seyner

lere vnd predigen auß gericht/mer denn jr keynen than hate.

Es können aber die Schweger vnd dyse vnmündige nicht obereyn kommen/die geringen vnd vnuerstendigen werde von den weysen vnd klügen veracht vnd bitterlich verfolgt. Wie sollē wir jm aber thun: da ist keyn ander trost noch troz/den̄ das wir wissen/es gefelt Gott also/das er solch geheymnuß verberge für den klügen vnd weysen / für den schwegern vñ gütducklern. Zum andern/tröstet vnd erfreuet vns das auch/das wir wissen/vnserē predig gee nicht on frucht ab/die vnmündigen nemens gerne an den̄ den selbigen offenbaret der vatter. Also lernen wir nicht im̄ hertzen/sonder Gott ist all da meyster/der es offenbaret wem er will/wie vñ wenn es jm gefelt/doch thut er solichs durch das eüsserlich wort/welchs er darzū verordnet hatt als eyn mittel/vñ wie eyn ro: da durch er solichs ins hertz hynein bringe.

Nun lygt nit vil daran/so du schon die schüler nit sichst/oder hörst von den sachen vil reden. Sie hörst du/das sie vnmündig seind/prechen nit bald herfür / pochen nit groß mit irem geyst vnd grosser kunst. Gott hatt im̄ seine schüler wol vorbehalten/er weyß sie auch wol zū finden / wie er zū helia sagt/der da meynet/es were keyn from̄ mensch im̄ gāzen Israhel/vnd er were alleyn vberblyben. Ich hab mir (sprach das götlich antwort) lassen vberblyben. 7000. man / die nicht ire knye gebogen haben für dem Apgots Baal. 3. Regū. 19. Rom. 11. Also thut got noch herwtigs tags/wen̄ wir maynen es sey geschēhē vmb das Euāgelion/wen̄ sich so vil rotten er heben. Ey lieber fürcht dir nit/erschreck nit/Gott hatt seyne schüler an vil orten zerstreuet/die wir nit sehen noch wissen/darumb sollen mir nur lautterlich die sach Gott heymsetzen/sagen/wie Christus hie sagt

**Ja vatter/den̄ es ist also wolgefellig gewesen für dir.**

Als wolt der heri sagen. Ach vatter/dz ist die eynige v:sach das es dir wol gefelt. Was ist aber das für eyn Gott/gefelt jm denn das/das die lewt verblendet werden/ist er doch eyn

Got der den todt des sünders nicht habē will? Ja es ist war/  
Aber die schrifft sagt/Exo. 33. Rom. 9. Welchem ich gnedig  
bin/ dem bin ich gnedig / vñ welchs ich mich erbarme / des  
erbarme ich mich. Got ist niemands nichts schuldig/darum  
thut er auch niemand vnrecht/so ihene schon bleiben in irer  
verstockung. Die art hat aber Got/das er den geringen hilfft/  
vñ forst nit vil nach den grossen vñ weisen/wie seer sie auch  
darum wüten/er lest sie bleiben in irer verstockung. Derhal-  
ben so du sie darüber siehest zürnen/toben vñ wüten/so befiel  
es got/vnd sag/es sey also gottes wolgefallen/der da auß lau-  
ter gnade on verdienst vñ on alle werck diß geheymnuß dem  
armen verachten heüflein offenbaret/wie chriſtus auch sagt  
zú seinen Jügeren Luce. 12. Fürchte dich nicht du klaine herd  
den es ist ewers vatters wolgefallen/euch das reich zú geben

Das sein aber nicht die klainen/die da eüßerlich im leben  
vnd wandel gering vnd arm sindt/oder die da vnuerstendig  
weren in der schrifft. Den wen die also großen kloge wolten  
bleiben/nichts lernen/vñ sich als die vngelereten für die klai-  
nen/geringen vnd vnmyndigen wolten außgeben/auch die  
so in der schrifft erfahren weren/verachten wolten/das were  
nichts geredt. Ja die selbigē hoffertigen stolzen rülzē/sindt  
die rechten klügen/die sich inwendig groß empor heben/vñ  
vil von sich selbs halten/verachten andere/vñ mainen sie wis-  
sens allain. Vñ darumb verbirget auch got vor inen vñ wil  
solchen hochmütigē stümplern die geheymnuß nicht offen-  
baren. Damit es mag wol sein/das ein petler in einem grawen  
siltz vnd langen parte/ein hochfertigen geyst haben kan/dan  
etwan zehen Fürsten in gülden klaydern. Got sihet des rech-  
te innerliche demütige hertz an/daz sich selbs für verdamlich  
achtet/vnd allain auß gnade begeret gottes hilff/den selbigē  
eröffnet auch got seinen willen. Sie aber klüg wöllen sein  
für got/vñ ir ding nicht wöllen lassen verdammen/die selbi-  
gen verwirffter/vnd erzaiget einen grossen gewalt wider sie  
das im ein solch arm/gering heüflein nicht dürffe fürchten.  
Dan so er der klügen hertz verstockt vñ in seiner handt hat vñ  
helt/vil mer kan er ire faust vñ alle ire anschlege verhyndern/

den Got will ire werck vnd weyßheyt nit loben / er will inen  
gar keynen rühm lassen. Es ist nie keyn heylig gewesen / der  
vmb eyns menschlichen wercks willen eyn wunderwerck ge  
than hett / sonnder es stett allwege darbey geschüben. Er hab  
Got angerufft / vnd hab geglaubet ic. Folget weytter im text.  
**Alle ding seind mir vbergeben vō mei-**  
nem vatter.

Das ist eyn rechter grosser rühm / den hie Christus thut / dz  
er sey warhafftiger Gott / vnd eyn naturlicher son Gottes / da  
er spricht / im seyen alle ding vbergebē. Zie schleüß er nichts  
ausß. Denn kurzumb / was nit Gott ist / das ist vnder im / das  
leret vns auch vnser glaub. Vñ wirt hie nichts außgenomen  
weder Engel noch Teüffel / weder sünd noch gerechtikeyt  
weder tod noch leben / weder schand noch eer / alles woz man  
nurnennen kan / das ist alles vnter Christo / vnd muß im alles  
vnder lygen. So nun Christus wirt gesetzt vber alle ding / vñ  
alle ding seyn seynd / so muß er ettwas höhers seyn denn eyn  
Creatur / oder eyn geschafften ding / sonst könd nicht alle Crea  
tur seyn eygen seyn / vñ im vnder den füßen lygen. Das darff  
im keyne Creatur zueygen / den alleyn dyser Christus / Gottes  
warhafftiger son / dem seind alle ding gegeben auch nach der  
menscheyt / denn nach der Gottheyt / was er vorhyn eyn here  
vber alles / vnd alles was vorhyn seyn.

Das ist die eer / die Gottes eer gleych ist / die gibt er dysem  
Christo / darumb ist er warhafftiger Gott / vñ eyn naturlicher  
son Gottes. Denn also sagt Gott im Propheten Jesaia. 42.  
Meine eer will ich keynem andern geben. So ist nun gottes  
eer nichts anders / den vber alle Creatur seyn / das leben gebē /  
den Teüffel vnder sich werffen / den tod vñ sünd mit füßen  
treten / das seind rechte gödeliche werck / die alleyn Got zuge  
hören / die eer hatt er / die will er auch alleyn behalten / vnd sie  
niemandt mittaylen / wem er sie aber mittaylet / der muß auch  
warhafftig Gott sein. Der Teüffel ist wol eyn here des todts  
vnd der sünde in den gotlosen vnd vnglaubigen / aber er kann  
nichts lebendig machen.

Wie wol nun Christus alle ding von ewigkheit vnder jm  
gehabt hatt/so ist er doch nicht von ewigkheit eyn mensch ge-  
wesen / sonnder in der bestimpten zeyt ist er mensch worden /  
wie es verheissen war in den Propheten / vñ ist offenbart wor-  
den durch den heyligen geyst von vnser wegen / das jm alle  
ding seind vnterworffen.

Das wort gilt vnns / denn ich muß wissen eyn ort / wo ich  
Got vñ alle ding find. So spricht nun Christus zu mir. Wilt  
du alle ding haben / so such es in mir / denn in Christo sind alle  
ding / vñ jm sind sie alle vnterworffen / darzu alles gûts steckt  
in jm / auch wonet in jm die Gotheit leyphafftig / vñ in jm  
wirft du alles gûts finden. In dem eynigen Christo müssen  
alle glaubigen rechtfertig vnd selig werden. Darumb sprichet  
der Herr weytter im Euangelio.

**Und niemandt kennet den Son / denn**  
nur der Vatter / vnd niemandt kennet den Vatter / den nur der  
Son / vnd wem es der Son will offenbaren.

O Herr Gott / wer hett das gemeynt / das dyser verachter  
Christus solt Gottes son sein? Den mit dysem wörtlein (Nies-  
mandt) schleißt er alle ding auß / das nicht Christus ist. Das  
kann die vernunft nicht verstee / das alle ding sollen vnder  
dysem Christo lygen / vñ er soll doch so schentlich vñ verecht-  
lich am Creutz sterben. Was ist das für eyn Herr / des lebens /  
vnd des tods? lest er sich doch ansehen / als könn er jm das le-  
ben selbs nicht erhalten / das er so schentlich stribet? schleißt  
dem tod in rachen hynein / das alle welt meynet / er hab jm ver-  
schlungen / vnd es sey nun auß mit jm / noch ist er Gottes son /  
der alleyn den Vatter erkennet / vñ sonst keyn creatur / es wöllt  
jm den der Son offenbaren. Wem es der son nicht offenbaren  
im hertzen / so hilff ihm in ewigkheit keyn werck / keyn verdienst  
noch keyne bereytung darzu. Es ist nur Gottes art vñ werck  
das er sich der elenden erbarmet / vñ lere die vnuerstendigen.

Der Christlich glaub vñ das Christlich leben steet in dem  
eynigen wörtlein / Offenbaret von Gott / denn wo das nit für  
handen ist / da wirt keyn hertz nimmer recht gewar dyses ge-  
heymnis / das da vpo:gen gewesen ist vñ der welt her. Nun

offenbarets Got alleyn seinen von ewigkelt auß erwelten hey-  
ligen/den ers will kundt gethan haben/sonst wirt es wol für  
yederman verporgen/vñ ein recht geheymnuß pleyben. Was  
will hie der freye/ja der knechtische gefangne wille gûts dar  
zû sagen? Wo will er auß seynem vermögen zû dysem liecht  
vnd geheymnuß kômen? Wennes jm der allmechtig starck  
Got verbirget/so wirt er sich mit keyner bereytung oder gût-  
ten wercken dar zû schicken. Es kan keyne creatur zû dyser er-  
kântnuß kômen/Christus offenbarets jm dan alleyn im hertz  
en selbs. Da geet zû poden alles verdienst/alle kreffte vnd ver-  
nunfft/vñ gilt für Got nichts. Christus muß es alleyn gebē.  
Solget nun weytter im Euangelio.

**Ikumt zu mir alle die jr müheselig seyt**  
vnd beladen/ich will euch erquickē.

Ly wie eyn selzams laden ist das/warumb berufft er nit  
die starcken/reychen/gesunden/gelehrten/könige/Fürsten/vñ  
herren? Was will er dem armen müeselligen vñ beladnen mē-  
schen? Nichts anders/denn das es jm also wol gefelt/sicht  
dich nun an deyn vnglaub/hunger/armût/schandt/oder an-  
der trübsal/wo wiltu anders hyn lauffen? Christ hat vorhyn  
gesagt/er hab alle ding in seiner handt/yezt rufft er dich elen-  
den zû jm. Er verhayset hye wie ers kan thun/also wil er es  
auch gerne thun dir/dir verhayset ers/kôme denüs zû ihm.  
Pffuy der grossen sünde. Ist es doch schande vnd sünde das  
vns die Sonne sol anscheinen/das wir solche süesse/väterli-  
che/tröstliche wort vbergeen/vnd gassen anders wo hin/da  
nichts bestendigs noch gûts ist. Alles gûts ist allain in chri-  
sto zû sûchen. Dan in jm hat got alle schätze aller weißheyt/  
vnd alles gûten vberflüssig geschüt vnd verporgen. Wir sol-  
ten auff lautern scher messern nach ein solchē freündtlichen  
helffer lauffen/der nûr die schwachen/Betrübten vnd müeseli-  
gen leit zû sich fordert vñ locket. Wir solten on ermannung  
vñ forderung zû jm eylen/so muß er vns elende/sieche/arm seli-  
gen aller erst selbs zû jm locken/ruffen vnd fordern.

Was ist die vrsach das wir solche wort in wind schlagen

B ij

vnd nicht vns nach jm vmb hilffē vmb sehen/ auch nicht al-  
lain zū jm lauffen/der alle ding in seiner handt hat/vnd alles  
güts genüg wil geben: Das ist die vrsach. Die person Chri-  
stus ist zū gering/nyemand glaubts/nyemāds trawt jms zū/  
das er solchs vermöge vñ wolle gebē. Vnser verflüchter vn-  
glaub thüt jm dyse ere nicht/daz ers glaubt er könne es thün/  
darumb erlangen wir auch nichts/vnd geschicht vns eben  
recht/das wir arme stumpler bleiben/Bayde an leib vnd sele.  
got hat alles güts leiblich auch die ware gotheit/wie gesagt  
in dysen christum gelegt/das/wer da etwas bedarff/es sey an  
leib oder sele/der kōme zū jm/er findts vil reichlicher bey jm/  
dann wir pitten oder gedencken können. Wer dan Christum  
veracht/vnd wil vergebung der sünde oder ein gütt gewissen  
ewiges leben/gesundtheyt/gerechtigkeyt/seligkeyt/oder was  
das dan ist vnd sein mag/Im Closter/zū Rom/zum heyligen  
grab/oder anderßwo in seinen wercken sūchen/der verlaug-  
net Christum/als ein amechtigen erlöser/vñ verspottet seyn  
blüt/sterben vnd aufferstecken/dem wirdt auch billich wider  
hye noch dort geholffen/den er setzet Christum auß dem weg  
dardurch wir allain zū dem vater vnd zū allem güten kōmen  
vnd mögen sollen.

Darumb nür dyser vnd annckparkeyt halben/were es wol  
das vns got lieffe tag vnd nacht kragen vnd scharren im  
schwayß vnser angesichts/vnd doch vmb sonst/so das das  
erdtreich nichts prechte denn lauter disteln vnd dornen/wie  
es dann gewiß thün wirdt/nicht allain an leiblicher nahrung  
sonnder auch am worte. Sehe nür ein yeglicher auff sich  
selbs/wie wir vns so wild vnd verzagt stellen/wen wir nür  
ein groschen sollen vmb Gottes willen geben/in den gemai-  
nen kassen/oder sonsteynem armen mēschen ins hawß brin-  
gen/da wil es so gar nicht von hertzen/vil weniger auß dem  
kassen. Was ist die vrsach: das ist. Gelt ist vnser abgot/dar-  
umb ligt das hertz stets alda/were der ewige/rechte/naturli-  
che got in vns durch den glauben/o wie wird ein pack offen  
vol der christlichen liebe in vns brennen.

Wenn wir solchs glaubten/das der milte gütige/reiche/



mechtige Christus das nicht allain kan thun/nemlich vnns  
helffen in allen vnsern anligen / warinn wir in anruffen/wie  
er oben gesagt hat. Alle ding sein mir vbergeben von meinem  
vatter/sonder will es auch miltiglich vnd reichlich vns mit  
tailen vn gerne geben/es würde bald besser mit vus werden.

Denner spricht ye/kumpt her zu mir alle die jr müeselig vn  
Beladen seyt/ich wil euch erquicken. Als solt er sagen/kumpt  
her vmb sonnst/one verdienst/dürfft darumb nicht vil fasten  
oder arbayten/nicht vil werck thun/oder groß verdienst mit  
euch pungen/gee nur mit dem glauben des hertzens zu mir/  
haltet mich für ein solchen gütigen gnädigē erlöser/wie ich  
mit euch rede/so hats kein not/kumpt doch nur/ich wil euch  
erquicken / es sol bald besser vmb euch werden. Es wirdt nit  
heuchelerey seyn / Ich will euch das herze vnnnd den geyst  
mütig machen/wider hell/sünde/tod vnd teuffel/das jrs für  
len werdet. Jr ligt yetzund in bösem gewissen/gantz verzagt  
vnd verschmäch/seyt elend/arm/müeselig vnd bekümmert/da  
ist nyemand der euch kan oder mag/rath/trost oder hilffe ge-  
ben. Gottes zorn ist zu gewaltig vber die sünde/vor seiner ge-  
rechtigkelt muß sich hymel vn erden biegen/vnd kan vor jm  
nyemand gerechtfertigt werden den allain durch mich. Dar-  
umb zaige ich euch denn nechsten weg an/kumpt nur her/er-  
kennet ewer armiseliges böses leben/das jr verdampft vnd sün-  
der seyt. Solche schüler begere ich zu haben/solche lewte for-  
der ich zu mir. Mit den gesunden hab ich nichts zu thun/mit  
den gerechten vn fromen hab ich kein gemeinschaft. Mein  
reich ist ein spital d siechen/da selbs bin ich ein arzt. Darum  
wer da begert gesundheyt/ein frid sam gewissen vn ein rüigs  
hertz/der lauff nit weit hyn vnd her/an dis oder jhenes ort/er  
kum zu mir. Den der ist mir eyn rechter gast in meinem spital/  
der seine krankheyt erkennet / vnnnd der sünden zwang fület.  
zum andern/der da hilff vn trost auß hertzen von mir be-  
get/vnd glaubt/ich wöll jm helfen / den ich auch frölich vn  
bestendig erquicken will/so das er auch nymer mer des tods  
soll sterben. Joan:8. Vnd saget ferrer im Euangelio.

C

## Nempt auff euch meyn joch.

Das ist die vrsach/das man nicht zu Christo lauffe/er lege dem alten Esel eyn joch/das ist/das Creutz vnd mancherlay trübsal auff den hals. Da will der alt Adam murren/vnd sich nit sporen lassen/noch die tödtung seines willens dulden. Ja wen im Christus eyn taschen mit rotten gülden gebe/vnd im eyn kisten vol gelds verspröche/so möcht er frey/willig vnd gerne zu Christo lauffen. Aber Christo spricht alhie. Laß dich solchs nicht betrüben/bekümmere dich nicht derhalbē. Nym du meyn joch auff dich/ich will dir wol auß dē vnglück hel- fen/laß dich daran gnügen/das ich hynweg neme deyner se- len mühe vñ arbeyt/darzu eyn böses gewissen/bis du nur ge- duldig/so ich den alten esel panzerfuge/er muß getödt seyn/ soll er anders von mir erquicket werden. Das ist die weyse vnd art meines Königreichs/das die/so darinnen seyn/oder seyn wollen/steets müssen absterben den lusten des alten Adams/ vñ im geyst erneuert werden durch zunemung des glaubens Das helt auch die Tauff in sich.

Vnd wirt hie nicht gesagt von dē joch/das vns Christus eyn geringer gesetz gebe/den Moyses gesetz ist gewesen. Das joch heyst hie Christus nichts anders denn die erwürglig der Begyrden/des alten menschen. Wen wir vns nur gnügen lies- sen/das wir im gewissen gereynigt/durch Christum für got zu friden steen/so wird vns das joch des alten Adams nicht weethun/wenn vns schon der Fürst oder Kayser den kopff wölt abhawen/wurd es vns wenig zuschaffen geben/den in Christo ist das leben auch mitten im tod / Ja/das wurdē wir gerne thun/vnd den tod mit freuden annemen/wen wir den Christum für eyn solchen man hielten/wie in vns dis Euan- gelion abmalet. Darumb spricht er weytter im Text.

**Und lernet von mir / denn ich bin senfft-  
mütig/vñ von hertzen demütig/so werdeut jr rüw finden für  
ewre selen/denn mein joch ist senfft/vnd mein last ist leycht.**

Das ist eyn lieplicher vñ seer tröstlicher Text/das wir vns  
nicht entschuldigen dürffen vñ sagen. Ja ich wolt gerne zu  
Christo kommen/ich wayß nit wo durch ich im gefallen kann  
Ich wayß nicht was er will von mir haben: Höör zu/hie eröf-  
net er/wz er vñ seynen fromen schülern fodert. Er legt dir nit  
eyn schwere/lange/grosse/vnuerstendige lection für /kanstu  
im nur glauben/Brauch hie nur so vil deiner vernunfft. Denn  
das ist die rechte kunst/wen wir also lernen / wie er vns allda  
fürhelt/nemlich/er wölle bey den geringsten vñ verachtesten  
sein/die nichts güts auff sich pawen/sonder alleyn auff Chri-  
stum trawen/vnd wen wir von im lernen sensftmütig zu sein  
Nicht wie etliche/die da eüsserlich sensftmütig seind/inwē-  
dig aber seindt sie beiffig/giffig/neydisch/vnd die grösten  
schelck. Hüt dich für den heichlern.

Christus leret anders von der sensftmütigkeyt/die also ge-  
sinnet ist/nicht böses zugeben vmb böses. Den Christus joch  
hat die art in im/das die feynde vns dz vnser nemen/da durch  
wir zornig werden/vnd gehalten vnns vbel darumb/wollen  
vns rechen/fluchen/schelten/vnd sind vngedultig darüber.  
Christo aber spricht/hieher/lerne vñ mir nit zornig sein/noch  
rachgeyrig/so es dir vbel geet/so dir wirt das deyn genommen  
oder wirst yrgend wo mit beleydigt/bis nit zornig noch vn-  
gedultig/bis sensftmütig vnd güts müts darzu/thu wie ich/  
den ich las mich schelten vñ verachten/vñ bleyß gleych wol  
frölich/thu im auch also/weyl du mich hast im glaube/wir-  
stu freude vnd frid gnüg haben/es schadet nit/wen es schon  
dem alten Adam nit nach seinem willē geet/den also muß ich  
seine vernunfft dempffen/vñ seine klügheit zur tohneyt mache  
Den ich liebe/den pflege ich also/wie mein liebs kynd züstre-  
chen. Ich neme im die creatur hynweg/das er gewiß lerne /  
es sey keyn Bestandt in den Creaturn/darumb sich auch nicht  
auff sie zu verlassen ist. Item. Es ist noch eyns das die welt  
vnrüwig macht/das ist hoffart/da sich eyner für dem andern  
herfür bücht/den er von got geordnet ist. Darumb so leret hie  
Christus das ander stücklein vñ sagt. Lernet von mir/ich bin  
demütig/nicht lernet den eüsserlichen vñ verachten wandel

von mir/in grawen rōcken vnd langem Bart einher geen/den  
nach sollichem ding frag ich gar nichts/sonder lernet vō her  
zen inwendig demütig zū sein/nicht höher ober sich zū farē/  
den wie ich dich in eyn standt wirff/so wirstu den eüsserlich  
auch wolrecht wissen in demüt zū wandeln/vnd dich nicht  
zū hebē ober deinen nechsten/sonder wirst deynen nechste  
allezeit besser achten/den dich selbs/darumb wirstu im von  
herzen gūnet/was im Gott gūnet/vnd was du dir selbs  
wöllest von yderman gegündt haben. Das kan nun die welt  
nit thun/sie will ymerdar empor/lest sich nicht benügen an  
dem/das jr Got gibt. Ist eyner ein Burgermeyster/so will er  
eyn Grass werden. Ist eyner eyn Grass/so will er eyn Fürst  
werden. Ist eyner eyn Fürst/so will er ein König sein. Eyn Kö  
nig will eyn Kayser werden. Hatt eyner ein Landt/so wölt er  
gerne noch zway/drey/vieer darzū haben. Vnd ist also keyn  
settigung noch keyne gnüge in der welt.

Aber Christus leret hie/vñ spricht. Wer da will erquickung  
von mir erlangen/der sey senssemütig vñ demütig von hertze/  
wie er auch ymmer belaydigt werde/so geb ers nur got heym/  
der wirts zū seiner zeit wol rechē/wie Christus selbs gethan  
hatt in seynem leyden vñ schmach/da ist er still vnd senssemü  
tig gewesen/vñ keyn wort dawider geredt. Ist doch zūletzt/  
zū grossen eren komen/vñ auffshōchst gepreyset wordē. Der  
gestalt Christi müssen wir auch eynlich werdē/müssen sensse  
vnd demütig von herten sein/so werden wir erquicket vnd  
rūw finden für vnser selen. Wie vns den S. Peter hoch ver  
manet dysen exempel vnd fürbild Christi nach zū folgen/da  
er in seiner ersten Epistel am andern capit. also sagt. Das ist  
gnade/so yemand vmb des gewissens willen zū Got trawrig  
keyt vertretet vnd leydet mit vnrecht. Den was ist das für eyn  
preys/so jr vmb missethat willen straych leydet. Aber wen jr  
vmb wolthat willen leydet vñ geduldet/dz ist gnad bey got.

Den darzū seyt jr berüssen/seytemal auch Christus gelitten  
hatt für vns/vnd vns eyn fürbildt gelassen/das jr solt nach  
folgen seinen fūßstapffen/welcher keyn sündt than hatt/ist  
auch keyn trüg in seynem mund erfunden/welcher nicht wi

derschalt da er gestorben wad/nicht diewet da er leydt. Er  
stellet aber dē heym/der da recht richtet/welcher vnser sünd  
selbs geopffert hat: an seynem leybe auff dem holze/auff das  
wir der sünden on sein/vñ der gerechtigkeit lebē/durch wel-  
ches streymen jr seyt gesundt worden. Denn jr waret wie die  
irrenden schaff/aber jr seyt nun bekert zū dem hyrten vnd Bis-  
schoffwer selen.

Die aber nach dysem exempel vñd fürbild Christi nicht  
wollen leyden/auch sich nicht verachtē lassen/noch ein gü-  
gen haben an irem standt/die werden ewig vnruwig/vñd  
nymmermer zū friden steen/vñd sie auch keyn sorgen/noch re-  
chen noch wütten noch toben helffen. Darumb kan die welt  
Christus noch vñd last mit tragen/sie ist zornig vñd in jr selbs  
vnfridsam/lest sich nicht benügen/was jr fürhanden kumpfe  
will ymmerdar empō: steygen/darumb kan sie nicht zū friden  
sein/noch eyn güten mü haben/derhalben will sie auch des  
noch Christi mit annemen/veracht Christum mit allem das er  
hat vñd jr anberwt/so muß sie auch wider hie noch dort fride  
haben. Den der Christus kan vñ will allein das gewissen frid-  
lich vñd frölich machen/vñ die betribten geyst erquickē.

Also haben wir nun in dysem Euāgelio drey ding vñd drey  
fürnemliche stuck. zumersten/warzu vns Christus vom vats-  
ter geschenckt sey/vñd was wir von im sollen gewarten/nem-  
lich/das er vns zū im lock vñ bringe/nit mit reysigem zeitige/  
noch mit harnasch vñd schwertern/sonder mit freuntlichen  
lieblichen worten/wie der. 47. psalm sagt.

Zum andern/zayget er an/wer die schüler sind/die er fodert  
vñd locket/nemlich/die müheseligen armen vñd beladne sün-  
der/welche ire gewissen vñd Gottes zorn druckē/vñ die der  
sünd gerne los weren/die ruffet er hie zū sich/vñ heyst die sel-  
bigen selig/die da also dürstet vñd hungert nach der gerech-  
tigkeit/Aber die da sad sind vñd voll/die rufft er gar nicht zū  
sich. Wiltu nun gesertigt vñ erquickt werden/so erkenne deis-  
nen jamer/dein beschweruß/vñd kum zū Christo/glaub im  
den er rufft dir nicht vmb sonst/er will dir starck hynaus helf-  
fen/wie er sagt/Er will dich erquickē/fürcht dich nicht/er

C ij

Kans und wils thun/ darffst nicht gedencfen/ das er dich erst  
gen Rom schick vmb eyn Absolution/ oder wolle dich stemp  
pen und erwürgen. Er will dir auch nicht eyn schwere büß  
auflegen/ mit fasten/ beten/ allmüsen gebē/ petteln geen/ wal  
farten volbringen/ dein gelt und güt in die kirchen vñ Clöster  
geben/ nain/ der kains nicht. Sonder er spricht Ich wil dich  
erquicken/ will dich frölich machen/ deyn sele soll frid habē/  
und güts müts sein/ rüwig vñ gefreyt werden vō den sündē.

Zum Sitten/ sollen wir nur von Christo lernen/ nicht vō  
den menschlichen/ nicht von deyner vernunfft. Was sollen wir  
aber lernen? Nicht das die welt hoch hebt/ nicht das von al  
ters her ist geacht gewesen/ denn Ezeiel am. 20. sagt. Wan  
delt nicht inn den füßstapffen ewer vetter/ die euch beflecken  
werden/ sonder das solt jr von mir lernen/ sensfmütig zū seyn/  
und demütig von hertzen/ nicht alleyn in eüsserlichen gepers  
den. Bleyb eyn yeglicher in seynem standt/ darinn er beruffen  
ist/ warte desselbigen auß/ bis ich jm eyn anders auff lege/ vñ  
thū das alles in eym nidrigen geyst/ der sich nicht in meynen  
gaßen erhebe/ und seynen aygen rühm süch/ die andern zūuer

Wer da nun will rüw finden für seyne selen/ der (achten.  
lerne hie dyselction von Christo/ nemlich/ das er sensfmü  
tig sey/ vñ von hertzen demütig/ den er spricht selbs Matth. 5.  
Selig sind die sensfmütigen/ den sie werden das erdrich bes  
sizen. Mit hader gewinnet man nicht vil land noch lewt/ es  
hatt auch keyn bestandt/ wenn es gleych eyn zeyt lang weret/  
so geets doch bald zū boden/ was mit ganck und hader/ oder  
mit dē schwert erobert wirt. Selig seind die milten/ sensfmü  
tigen/ und fridsamen. Auch so spricht Got in Jesaia. 66. Auff  
dem demütigen und erschlagenem geyst/ der da mit zittern vñ  
fürcht mein wort annympt/ da will ich wonen/ wie auch Da  
uid im. 50. psalm sagt. Die opffer gottes sind eyn zerprochner  
geyst/ Eyn zerprochen vñ zerschlagen hertz wirst du Gott  
nicht verachten.

Wer nun dysezway stuck mit wil lernen/ sonder will rachs  
gyrig seyn/ niemandt nichts nach geben/ stolziern vñ pochē  
will hochmütig/ frech vñ gefeyret sein/ und sich allzeyt em

porheben/der verwürfft Christus süesses joch vñ leyche last  
welche den fromen leycht vñ süesse seind. Den wen sie sich  
williglich im glauben darein ergeben/vñ pröchen iren wil-  
len/so ist inen leycht vñ süsse/tragens auch gerne/den Chri-  
stus hilfft in solchs joch vñ last tragen/ja er tragt dē schwer-  
sten vñ grösten teyl/den er hatt alles erfüllt/was sie thun vñ  
erfüllen sollen. Wer eyn solchen helffer hatt/dem ist auch ein  
grosse bürde leycht/vñd wie man spricht/mit eym gütten ge-  
sellen ist güt wandern/den eyner hilfft dem andern seyn bür-  
de tragen.

Wer aber dysen helffer nit will annemen/der soll unglück  
haben/angst/not/vñ vnfrid/vñ bekümmerniß des gewissens.  
Darumb spricht Christus wol. Kumpt zu mir/alle die ir mü-  
selig vñ beladen seyt/begeret nur hülff vñd trost/ir solt ers-  
quickt werden/vngetröst vñd vnerquickt/solt ir nit von mir  
kōmen/sonder solt anch mitten im tod vñ Creutz frölich blei-  
ben. Das sey von dysem Euangelio gesagt/Gott geb vns seyn  
ne gnade/das wirs lernen/fassen/vñd glauben. Amen.


✠ Gott sey ewig loß. ✠

Faint, illegible text, possibly bleed-through from the reverse side of the page. The text is arranged in several lines and is significantly obscured by water damage and discoloration.










24  
Vh 3519 #

(X2210346)



41.





B.I.G.

Farbkarte #13

**Auflegung der tröstlichen wort Christi. Matthei. xi. Ich preys dich vatter. Bis ans endt. Des Capitel. Durch Mart. Luth. zu Wittenberg im jar. M. D. vnd. xxvij.**



22,3392.

